

Griekse of vir die gemeente van Elohiem nie; 33 net soos ek almal in alles behaag en nie my eie voordeel soek nie, maar die van baie, sodat hulle gered kan word.

1 Korinthiërs 11:1 Wees my navolgers, soos ek dit ook van die Messias is. 2 En ek prys julle, broers, dat julle in alles aan my dink en aan die leringe vashou soos ek dit aan julle oorgelewer het. 3 Maar ek wil hê dat julle moet weet dat die Messias die hoof is van elke man, en die man die hoof van die vrou, en Elohiem die hoof van die Messias. 4 Elke man wat bid of profeteer met iets op sy hoof, doen sy hoof oneer aan; 5 maar elke vrou wat bid of profeteer met onbedekte hoof, doen haar hoof¹ oneer aan; want dit is een en dieselfde asof haar hoof geskeer is. 6 Want as 'n vrou se hoof nie bedek is nie, laat sy dan ook haar hare af sny; maar as dit vir 'n vrou lelik is om haar hare af te sny of te skeer, laat sy haar hoof bedek. 7 Want 'n man moet die hoof nie bedek nie, omdat hy die beeld en eer van Elohiem is; maar die vrou is die eer van die man. 8 Want die man is nie uit die vrou nie, maar die vrou uit die man. 9 Want die man is ook nie ter wille van die vrou geskape nie, maar die vrou ter wille van die man. 10 Daarom moet die vrou 'n aanduiding van gesag op die hoof hê ter wille van die boodskappers. 11 En tog, in die Meester is die man nie sonder die vrou nie, en die vrou ook nie sonder die man nie. 12 Want soos die vrou uit die man is, so is ook die man deur middel van die vrou; maar alles is uit Elohiem. 13 Oordeel self: Is dit betaamlik dat 'n vrou met onbedekte hoof tot Elohiem bid? 14 Of leer ook die natuur self julle nie dat as 'n man lang hare dra, dit vir hom 'n oneer is nie; 15 maar as 'n vrou lang hare dra, dit vir haar 'n eer is, omdat die lang hare vir haar gegee is as 'n bedekking? 16 Maar as iemand meen om twisgierig te wees, ons het nie so 'n gewoonte nie, en ook die gemeentes van Elohiem nie. 17 Maar terwyl ek dit beveel, kan ek dit nie prys nie dat julle saamkom, nie ten goede nie maar ten kwade. 18 Want in die eerste plek hoor ek dat, as julle saamkom in die gemeente, daar skeuringe onder julle is, en gedeeltelik

glo ek dit. 19 Want daar moet ook partyskappe onder julle wees, sodat die beproefdes onder julle openbaar kan word. 20 As julle dus op só 'n manier saamkom, is dit nie om 'n maaltyd² te eet na die voorbeeld van die Meester nie. 21 Want as julle eet, gebruik elkeen eers sy eie ete; en die een het honger en die ander is dronk. 22 Het julle dan geen huise om in te eet en te drink nie? Of verag julle die gemeente van Elohiem, en maak julle diegene beskaamd wat nie het nie? Wat sal ek vir julle sê? Sal ek julle prys? Hierin prys ek julle nie. 23 Want ek het van die Meester ontvang wat ek ook aan julle oorgelewer het, dat die Meester Y'shua in die nag waarin Hy verraaï is, brood geneem het; 24 en nadat Hy gedank het, het Hy dit gebreek en gesê: Neem, eet; dit is my liggaam wat vir julle is; doen dit as herinnering aan my. 25 Net so ook die beker na die ete, met die woorde: Hierdie beker is die nuwe verbond in my bloed; doen dit, so dikwels as julle daaruit drink, as herinnering aan My. 26 Want so dikwels as julle hierdie brood eet en hierdie beker drink, verkondig julle die dood van die Meester totdat Hy kom. 27 Wie dan op onwaardige wyse hierdie brood eet of die beker van die Meester drink, sal skuldig wees aan die liggaam en bloed van die Meester. 28 Maar die mens moet homself beproef en so van die brood eet en uit die beker drink. 29 Want wie op onwaardige wyse eet en drink, eet en drink 'n oordeel oor homself, terwyl hy die liggaam van die Meester nie onderskei nie. 30 Daarom is daar onder julle baie swakkes en sieklikes, en 'n aantal het ontslaap. 31 Want as ons onsself beoordeel het, sou ons nie geoordeel word nie. 32 Maar as ons geoordeel word, word ons deur die Meester getugtig, sodat ons nie saam met die wêreld veroordeel mag word nie. 33 Daarom, my broers, as julle saamkom om te eet, wag vir mekaar; 34 en as iemand honger het, laat hom by die huis eet, sodat julle nie tot 'n oordeel saamkom nie. Die ander sake sal ek reël wanneer ek kom.

¹ 11:4,5 Die woord “hoof” word hier moontlik doelbewus gebruik om 'n tweeledige betekenis weer te gee: (1) “hoof” in die sin van kop, en (2) “hoof” in die sin van outoriteit.

² 11:20 Die Griekse woord wat hier gebruik word, word op 15 ander plekke in die Na-Messiaanse Geskrifte gebruik – onder andere in die vers direk na hierdie een – en telkens is die vertaling bloot “ete” of “maaltyd”, nooit “nagmaal” nie.